

2 Mi por lesa

Skondí den selva tropikal



1. Hopi animal ta kore peliger den selva. P'esei nan ta skonde pa nan enemigu. Esei nan ta hasi na un manera sabí. Hopi biaha bo no ta mira e animal aunke e t'ei sí. Esei nos ta yama kamuflahe. Ora un palomba bèrdè skonde tras di blachi bèrdè por ehèmpel, bo no ta mir' é. Un koló asina nos ta yama un koló di kamuflahe. Bo tambe a yega di eksperensia kon difísil ta pa deskubrí un yuana den palu?



4. Ora e barbulètè kalima sera su alanan kolorido, e parse un blachi maron seku. Di e manera akí e barbulètè ta kamuflá su mes. Niun animal no ta hinka den su kabes pa kome e 'blachi' morto ei. Riba fondo di riu tin masha lodo. Ei e turtuga matamata ta biba. E parse un seritu di blachi seku riba fondo. Ora un piská pasa, e turtuga ta djis habri su boka i kome e piská.



2. E manchanan di lana di un jaguar ta proteh' é. Yagdó no ta mira e bestia fásil. Porko, konènci, biná i otro animal riba kua e jaguar ta yag, tampoko no ta mir' é. Asina e animal feros por aserká su presa sin ku esei ripará algu. Ora e víktima deskubrí ku e jaguar ta den su bisindario, ya ta lat kaba. Bo sa ku tin jaguar ku ta nase ku lana pretu? Nan ta yag anochi. E ora ei ta kasi imposibel pa mira e animal feros akí.



5. Den selva tropikal hopi animal ta kome insekto. P'esei e insektonan mester protegé nan mes. Algun insekto ta hasi manera nan ta un mata. E insekto palote por ehèmpel, parse un takí di un palu ora e keda drumi ketu. Den algun selva tropikal ta biba palote gigante ku ta mes grandi ku brasa di un adulto. Tòg ta difísil pa deskubrí un palote, pasobra e ta asina bon kamuflá.



3. Algun animal tin triki. Un okapi por ehèmpel, ta keda para ketu asina banda di palu òf mata seku ora tin un bestia feros den serkania. Komo ku e okapi ta maron i e tin strepi blanku riba e parti patras di su kurpa, e no ta yama atenshon den e ambiente natural ei. Hopi biaha e animal feros no ta mira e diferensia entre e tronkon di e palu i e okapi. Asina okapi ta protegé su mes na un manera ekselente.



6. Tin animal den selva tropikal ku por kambia di koló. Asina nan ta kamuflá mihó. Un kameleon por ehèmpel por kambia di koló ora e bai di un lugá pa otro. Si e ta sintá riba un blachi, e ta bèrdè. Si e ta riba suela, e ta bira maron. E koló di un lùart ta shinishi-marón. Den temporada di áwaseru tin mata chikitu ta krese riba su lomba. E ora ei e lana ta mes bèrdè ku e blachinan rondó di e animal.

3 Bo a comprendé?

• Lesa e teksto i kontestá e preguntanan.

Pregunta

1. Kiko ta tópiko di e teksto akí?
2. Kí sorto di teksto esaki ta?
 - A. Un kuenta
 - B. Un teksto informativo
 - C. Un teksto instruktivo
3. Kua meta ta pas serka e teksto?
 - A. Lesa pa plaser
 - B. Lesa pa haña informashon
4. Dikon hopi animal ta skonde den selva?
5. Kiko ta *kamuflahe*?
6. E lana ku mancha ku e jaguar tin, ta yud' é na dos manera. Kon?
7. Asina e animal feros por aserká su presa sin ku *esei* ripará algu (alínea 2). Na kua palabra e palabra *esei* ta referi?
8. Kua ta e frase nùkleo di alínea 3 (hòki 3)?
9. Kon un okapi ta kue un animal feros kabes abou?
10. Splika kon un barbulètè kalima ta protegé su mes.
11. Kiko un *palote* ta?
12. Kiko ta un *kameleon*?
13. Kon por ta ku bo no ta mira un lùart den temporada di áwaseru?